

Visoki predstavnik pozdravlja akciju EU na zamrzavanju sredstava svih haških optuženika

“Zamrzavanje sredstava koje je danas najavila Evropska unija je još jedna od mjera kojom će se suziti prostor u kojem djeluju osobe koje izbjegavaju pravdu. Njom se naglašava podrška koju Evropska unija pruža Međunarodnom krivičnom tribunalu u Hagu”, rekao je danas visoki predstavnik Paddy Ashdown nakon što je Vijeće Evropske unije donijelo odluku o zamrzavanja svih sredstava 18 haških optuženika.

Ovom odlukom se proširuje lista osoba na koje se odnosi zamrzavanje sredstava koja obuhvata Antu Gotovinu, Radovana Karadžića i Ratka Mladića, a koja je donesena 11. oktobra 2004. godine, na dodatnih 18 osoba koje je Tribunal javno optužio, tj. Ljubomir Borovčanin, Goran Borovnica, Miroslav Bralo, Vlastimir Đorđević, Goran Hadžić, Gojko Janković, Vladimir Lazarević, Milan Lukić, Sredoje Lukić, Sreten Lukić, Dragomir Milošević, Drago Nikolić, Vinko Pandurević, Nebojša Pavković, Vujadin Popović, Savo Todović, Dragan Zelenović i Stojan Župljanin. “Ovom odlukom se naglašava da više ne čekamo nego napadamo ove kriminalne mreže kako bismo ih u potpunosti iskorijenili”, rekao je danas visoki predstavnik.

Visoki predstavnik se nada da će bh. institucije, kao što je to ranije bio slučaj, dati podršku ovoj zajedničkoj akciji i odmah zamrznuti sredstva osamnaest osoba koje je Evropska unija danas imenovala. “Prethodna izjava o podršci je bila značajan signal za Evropsku uniju o spremnosti Bosne i Hercegovine da podrži rad Međunarodnog krivičnog tribunala u Hagu te da ispuni svoje međunarodne obaveze. Međutim, nadležne institucije i organi vlasti tek treba da poduzmu značajnije

aktivnosti u cilju provođenja ove obaveze.”

“Budućnost Bosne i Hercegovine u Evropi zavisi od njene spremnosti da sarađuje sa Međunarodnim krivičnim tribunalom u Hagu i da podržava njegov rad. Ova zemlja ima poseban interes za promoviranje ovih mjera. Bh. organi vlasti moraju poduzeti aktivnosti u cilju poštivanja navedenih obaveza. Nepoštivanje ovih obaveza bi poslalo negativan signal. Apsolutno je važno za organe vlasti Bosne i Hercegovine da pokažu da su ozbiljni u pogledu saradnje sa Haškim tribunalom”, rekao je danas visoki predstavnik.

OHR je 21. oktobra pozdravio stav bh. organa vlasti kojim su potvrdili da dijele ciljeve Vijeća Evropske unije te su poduzeli mjere na zamrzavanju sredstava tri najozloglašeniije osobe optužene za ratne zločine koje su još uvijek na slobodi, tj. Radovan Karadžić, Ratko Mladić i Ante Gotovina.